

# Dagang: Dr. M mahu semua rakyat dapat hak sama

UM - 4 JAN 1978

KUALA LUMPUR, 3 Jan. — Datuk Sri Dr. Mahathir Mohamad hari ini menyatakan azamnya untuk berbuat apa saja yang terdaya guna memastikan rakyat akan menikmati hak masing-masing melalui perdagangan dan perindustrian negara.

Bercakap kepada para pemberita sekembalinya dari percutian di Amerika, beliau berkata ini merupakan azamnya setelah mendapat tahu dilantik sebagai Menteri Perdagangan dan Perindustrian yang baru dalam rombongan kabinet minggu lalu.

Timbalan Perdana Menteri yang kelihatan begitu yakin dengan tugasnya yang baru itu berkali-kali mengulangi perlu rakyat terutama sekali dari golongan buruh dan petani mendapat hak mereka hasil perdagangan dan perindustrian negara yang menghadapi masa depan yang cerah.

"Setiap rakyat mempunyai hak menikmati kemakmuran negara dan melalui tugas saya yang baru ini saya akan berusaha untuk memastikan kemakmuran itu dirasai oleh semua", kata Dr. Mahathir.

Tentang Kementerian Pelajaran yang diambil alih oleh Datuk Sri Musa Hitam, beliau berkata pilihan itu adalah wajar memandangkan hubungan langsung yang sedia wujud antara Datuk Sri Musa dengan para pelajar.

"Saya tidak khuatir apa-apa kerana Kementerian Pelajaran berada dalam tangan yang selamat," ujar beliau sambil berseloroh.

Dr. Mahathir kelihatan bergurau dan menepuk-nepuk bahu Datuk Sri Musa sambil ke-

tawa besar bila saja mereka bertemu di bilik VIP Lapanganterbang Subang.

Menurut Dr. Mahathir, semasa di Amerika, beliau juga berpeluang menemui para pelabur yang telah menunjukkan minat untuk meluaskan lagi kegiatan mereka di sana.

Katanya, para pelabur di Dallas yang banyak membuka kilang elektronik di sini seperti Texas Instrument menyatakan keyakinan mereka terhadap iklim pelaburan di Malaysia.

Beliau memberitahu,

para pelabur di Amerika menganggap Malaysia sebagai salah sebuah negara terbesar menjalan perusahaan elektronik.

Dr. Mahathir juga memberitahu bahawa pegawai-pegawai kerajaan Amerika akan berada di sini bulan ini untuk mengetahui dengan lebih mendalam perkembangan-perkembangan terbaru di rantau sebelah sini.

Menurutnya, para pegawai Amerika telah menunjukkan minat terhadap ASEAN dan mahu datang sendiri melihat kemajuannya.